


**ՀԱՅՏԱՐԱՐՈՒԹՅՈՒՆ՝ ՔՐԵԱԿԱՆ ՎԱՐՈՒՅԹԻՆ ՓԱՍՏԱԲԱՆՆԵՐԻ ՆԵՐԳՐԱՎՈՒՄԸ
ՉԱՊԱՀՈՎԵԼՈՒ ՎԵՐԱԲԵՐՅԱԼ**

21.04.2023 17:03



Փաստաբան Լևոն Բաղդասարյանն այսօր ՀՀ փաստաբանների պալատին տեղեկացրել է, որ դիմել էն ՀՀ քննչական կոմիտեի Երևան քաղաքի քննչական վարչության ծանր հանցագործությունների քննության բաժնում քննվող քրեական վարույթով երկու անձանց՝ Արտակ Գալստյանի և Արման Մկրտումյանի պաշտպանությունը ստանձնելու համար, սակայն նախաքննական մարմինը չի ապահովում իր և փաստաբան Թադևոս Ալեքսանյանի ներգրավումը վարույթին:

Ընդ որում, ըստ փաստաբանի ներկայացրած տվյալների, քրեական վարույթին որպես մեղադրյալ ներգրավված նշված անձինք ազատությունից զրկված են, նրանցից մեկը չունի վարույթին մասնակից պաշտպան և զրկված է պաշտպանության իրավունքից ընդհանրապես:

Այս մասին տեղեկությունները տարածվել են նաև տեղեկատվության հանրային աղբյուրներում:

ՀՀ փաստաբանների պալատի փաստաբանների իրավունքների պաշտպանության հանձնաժողովը հրատապ կարգով քննարկել է ներկայացրած հաղորդումը փաստաբանների մասնագիտական գործունեությանը խոչընդոտելու համատեքստում: Այդ կապակցությամբ Հանձնաժողովը՝

- իր մտահոգությունն է հայտնում փաստաբանի մասնագիտական գործունեությանը խոչընդոտելու վերաբերյալ շարունակվող հաղորդումների առնչությամբ, հիշեցնելով, որ այդպիսի գործելակերպն ուղղակիորեն վտանգում է անձանց սահմանադրությամբ երաշխավորված հիմնարար իրավունքները և ազատությունները,

- Իրավասու մարմիններին հորդորում է խստորեն հետևել օրենսդրական պահանջներին, հիշեցնելով, որ փաստաբանի լիազորությունների իրականացմանը խոչընդոտելն առաջացնում է քրեական պատասխանատվություն: